

Pizokel Kligga

Ausschnitte aus dem Programm 2007

Sid neustem hät Valzaina - as Asylantaheim,
döt oba finden das - gar nit alli fein!
Ma köhri Dorfidylla - di gängi dur das futsch,
Ir Kircha bettens flissig - für na Strossarutsch!
d`Vorratskammera dia sind jetzt schu alli pumpa voll,
oh liaba Gott, lass jetz dr Rutsch koh - das wäri huara toll!

Nit wit aweg in Obervaz - fascht zur gliche Zit
Do gits au roti Köpf - und wägem gliche stritt!
As Asylantaheim das tuat schu nit dohara passa,
däm Martin Schmid, dem fählendi bigoscht schu a paar Tassa!
Dia schlaua Vazer tüand a Kommission jetz i berüafa
dia Varianta vu Valzaina - mit am Rutsch zum prüafa.

Do suachi öper oder möchti gära öpis wüssa,
i nimma z`Händy föra - und han schu a schlächts Gwüssa!,
Isch as dia, dia oder dia woni söt wähla, ,
i tuami dur dia Zahla wo i kenna dura kwäla! ,
Einer achter tippi i, jetzt isch au öper dra, ,
statt z`Fräulein vu dr Uskunft - ischs nu a Führwerma!

Übram grossa Taich - gits bald a neua Chef,
ma hoffi, das Frau Clinton käm als Präsinent ans WEF!
Könn ihar eu no erinnara - ma kanns fascht nit begrifa,
dia Gschicht mit dr Lewinsky und am Clinton sinara Pfifa.
Pizzokel`s händ z`Amerika, a guata Informant
Frau Clinton suachi schins bi üs - a gschlächta Praktikant!

Uf dr Präzer Höhi - hän Felsberger as Hüttli,
ufam Heiwäg, grüsch köhrt - ischs ächt as Frauafüttli?
Doch dinna töns oh Schreck - nochara Männerstimm,
z`Gwehr parat und d`Axt im Griff jetzt wirts denn für dä schlimm!
An Ibrächer isch gsi - dä Ma ghört doch in Kischta!
Nein nein, ich bei Sozialprogramm - für Rumänischi Tourishta!!

Jo miar sind bald nümma do und tüan bald nuno schwitza,
so stohts im Johresbricht - vu däna Umweltfritza!
Meh Wind mehr Räga, Wasser - und bald kei Gletscher meh!
Doch Planer müand pressiara - mit am Khurersee!
Denn wenn dia Gletscher schmelzen - dass hän mir eu den gseit,
Dänn isch dr Meeresspiegel - grad uf dr Lenzerheid!

Wintersport isch geil - und nit oh jemine!
Guati Bündnersportler - und nit oh jemine!
Snöber, Langlauf, Curler - sind nit oh jemine!
Medalia, silber, bronce und gold, sind nit oh jemine!
A Sportart gits bi üs - dia isch oh jemine,
miar alli wüssen wär das isch - jo klar, dr EHC!

Hoppla Schorsch jetzt hämmer - hald dä huarra Fläck,
dia Parkplätz voram Stadtheater dia sind würrklich wäg!
Zwenig Platta us Granit, wells tür sind wia na Sau,
g'froggt hän miar dr Architekt und dä isch zimmi schlaui!
Dä Platz gestalta sigi gsi, jo gar nit aso schwär,
als Vorlag Köpf vum Stadttrot gno - so grau und au so läär!

In Khur do gits an Automat im Parkhuus vis a vis,
da steckt ma, wenn ma usafahra will, sis Ticket dri!
Dia arma Grossröt müand halt-bekanntlich Rappa spara,
drum klauans Ticket`s anderna zum sälber usafahra!
Wo das dr Chef vum Parkhus köhrt hät - do hät dä halba gspunna
Ja Grossrad Claus kasch froh si, - hockt dä z`Namibia dunna!

As Renna mit da Ski - das goht nit ohni Schnee,
das hemmer jo dä Winter - bi üs schu öffters gseh!
In Kitzbühäl flügt an Heli - und bringt dia wissi Pracht!
Am Tag wird Pista prepariert und gschmolza in dr Nacht!
A wissi Pista zmitzt - innara bruna Wiesa!
In mina Hosa gsehts verkehrt us - a bruni Spur im wissa!